

**Regional News Unit AIR Aizawl
Saturday, March 30, 2024**

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Lok Sabha Mizoram bial chuh tura hming pelutte tan vawiin tlai thleng inhnuhdawh theihna hun hawn a ni.**
- **Khawvel chhandam tura Isua Krista khenbeha a awm champha ‘Good Friday’ chu khawvel hmun dangte rualin Mizoramah urhsun taka hman a ni.**
- **Mizo zinga All India Radio Top Grade Artist awmchhun Pi Vanhlupuii chu tukin dar 2 khan kum 77 mi niin a thi.**



WITHDRAWAL OF MP NOMINATIONS

Lok Sabha Mizoram bial chuh tura hming pelutte tan vawiin tlai thleng inhnuhdawh theihna hun hawn a ni.

April ni 19 a vote thlak tur Mizoram Lok Sabha bial inthlan turah hian mi 6-in chuh tumin hming an pelut a. Chuh tura hming pek luhte hi Ningani khan endik a ni a; hming pek luhte pawm vek a ni. Candidate leh an aiawhte’n Returning Officer, Nazuk Kumar-i hovin a pisa, Aizawl DC Office-ah General Observer Dr. Nipun Vinayak telpuinain hming pek luhte hi an endik a. Election Commission of India-in ram pum huap leh state huapa a pawm political party candidate Pu Lalbiakzama, Indian National Congress; Pu Richard Vanlalhmangaiha, Zoram People’s Movement; Pu Vanlalhmuaka, Bharatiya Janata Party; Pu K. Vanlalvena, Mizo National Front te, ECI-a inziaklut party candidate Pi Rita Malsawmi, Mizoram People’s Conference leh Independent Candidate Pu Lalhriatrenga Chhange te nomination chu pawm vek a ni.

Vawiin tlaia inhnuhdawh hun a tawp hnuah Lok Sabha Mizoram bial chuh tur candidate a chiang tawh dawn a. Inhnuhdawh tum an awm lo ni a thudawn a ni.



GOOD FRIDAY

Khawvel chhandam tura Isua Krista khenbeha a awm champha ‘Good Friday’ chu khawvel hmun dangte rualin Mizoramah urhsun taka hman a ni.

Kohhran lian ber Presbyterian Kohhran chuan nimin khan inkhawm chhawng thum buatsaihin thusawitute’n chawhma lamah ‘Isua Krista hi engtin nge kan tih tak ang le?’ tih chu an zirho a, chawhnu inkhawmah ‘He mi hi Pathian Fapa a ni ngei mai’ tih thupui hmangin thu an sawi a. Zan inkhawmah chuan ‘Thlanah an zalh’ tih thupui hman a ni. Ningani zan, ‘Venpui Zan’-ah khan Synod Moderator Rev. R. Vanlalnghaka chuan Nursery Vengah hun a hmanpui a, ani bakah hian Synod puipate chu Aizawl khawpui Kohhran thenkhata Lalpa Zanriah buatsaih turin an kal hlawm a.

Venpui zanah hian thupui inang ‘Isua kan hralh ve em?’ tih chu zirho a ni a, Presbyterian Kohhran chuan Venpui zanah hian Isuan a zirtirte zanriah hnukung a kilpui hriatreng na’n Kohhran tinah Lalpa zanriah sacrament an kilho a, Catholic kohhran chuan Isuan a zirtirte ke a silsak zan hriatreng na’n Kohhran rawngbawltute ke Puithiamte’n silsakin mass an buatsaih baw a ni.

Catholic Kohhran chuan nimin kha Isua Krista tuarna an tuarpui tih lantir na’n hmun hrang hrangah Kraws kawngzawh an huaihawt a, Kraws chawimawina hun an hmang baw.

Good Friday hi Siaha-ah pawh urhsun leh hlawk taka hman a ni a. Kohhran thenkhat chuan ruai nen he hun hi hmangin a tam zawk erawh chuan thingpui ruai nen an hmang thung. ECM Kohhran chuan Venpui Zan khan kohhrana pastor pension tawhte leh tanglai te Kohhran hrang hrangah tirin Lalpa zanriah sacrament an buatsaih a, Ningani zana kil hman lote’n nizan khan sacrament hi an kil ve thung.

Saitual khawpui chung Kohhrante pawhin Good Friday hi urhsun takin an hmang a hun remchan dan a zirin Lalpa Zanriah Sacrament inkhawm buatsaih a ni baw a. BCM Kohhrante chuan ‘A kin ta’ tih thupui hmangin Pathian thuchah an ngaithla a. Lungleiah pawh Good Friday hi urhsun taka hman a ni a, Lungleia BCM Kohhrante chuan, ‘A Kin Ta’ tih thupui hmangin Sermon an ngaithla a ni.

<><><>

TOP GRADE ARTIST VANHLUPUII PASSED AWAY

Mizo zinga All India Radio Top Grade Artist awmchhun Pi Vanhlupuii chu tukin dar 2 khan kum 77 mi niin a thi.

Pi Vanhlupuii hi kum 1946 July ni 2 khan hla phuah thiam Pu Vankhama leh Pi Laldengi te inkarah Dawrpui, Aizawlah a lo piang a. Kum 1973 March ni 14-ah S. Lalthlamuana nen inneiin fapa 1 leh fanu 2 an nei a. Dawrpui Veng, Aizawl, Pu Vankhama builiding-ah an cheng a ni.

Vanhlupuii hi kum 1950 vel atangin a zai tan a. Zaithiam avanga ram hrang hrang fang kual tawh, zai intihsiakah pawh lawmman pakhatna wawi tam lo la tawh a ni. Kum 1957 atangin Radio-ah hla a record tan a, kum 1969-ah Grade ‘A’-ah a kai chho a. Mizo zaithiam zingah All India Radio (AIR) Top Grade Artiste awmchhun a ni zui a. A khawvel zinkawng a zawh tawp thlengin Mizo zinga Top Grade Artiste awmchhun a ni ta a ni.

Pi Vanhlupuii hi Northeast-a AIR Top Grade Artist pathum awm zinga mi a ni a, an zinga pakhat hi kum 2011 khan a boral tawh a ni.

<><><>

CANDIDATES’ ASSETS

Mizoram Lok Sabha bial khat inthlanna chuh tura hming pe mi 6 zingah Congress party candidate Pu Lalbiakzama chu a haus a ber.

Mizoram Lok Sabha bial inthlan chuh tur zingah Mizoram Police Service (MPS) hlui, Home Secretary a nih laia a hna atanga chawl ta Congress candidate Pu Lalbiakzama hian nomination a thehluh ruala affidavit a theh luh telah chuan a sum fai neih, khawih chet theih thil Cheng vaibelchhe 1 a hlu a neih laiin khawih chet theih loh thil Cheng vaibelchhe 2 leh Nuai 80 a nei a. Khawih chet theih loh ro a neih hi lo neih nana siam chi ram pakhat leh lo neihna atana siam chi ni lo ram 2 a ni. A nupuiin khawih chet theih thil Cheng 4,790 hu a nei a, a chhungkaw midangte'n khawih chet theih thil an neih belhkhawm chu a hlut zawng Cheng Nuai 7 Sing 4 leh Sang 1 a ni. Candidate 6 zinga 4 te hi an thil neih zawng zawng belhkhawm Cheng vaibelchhe khat chuang an ni hlawm a. A rethei ber chu BJP candidate Pu Vanlalhmuaka a ni a, thil khawih chet theih Cheng Nuai 11 leh Sing 3 a nei a ni.

Hausa ber dawttu chu independent candidate Lalhriatrenga Chhangte a ni a. A nupui ram neih hlut zawng nena chhut chuan a thil neih zawng zawng hlut zawng hi Cheng vaibelchhe 2 leh Nuai 7 chuang a ni. A pathumna chu Rajya Sabha MP ni lai MNF candidate Pu K. Vanlalvena a ni a. Lak sawn theih thil Cheng Nuai 58 Sing 3 leh Sang 6 hu a neih laiin lak sawn theih loh ro, Cheng vaibelchhe 1 leh Nuai 24 hu a nei a ni. ZPM candidate Richard Vanlalhmangaiha chu palina niin lak sawn theih thil Cheng Nuai 97 Sing 7 leh Sang 4 a neih bakah lak sawn theih loh ro, Cheng Nuai 70 a nei a, a belhkhawm chu Cheng vaibelchhe 1 leh Nuai 67 a ni. Hmeichhe candidate awm chhun Pi Rita Malsawma (MPC) chuan laksawn theih chi Cheng Nuai 16 leh Sing 6 hu thil a nei a ni.

<><><>

POLL TURNOUT

Chief Electoral Officer, Madhup Vyas-a hova a pisaa thukhawmte chuan mipui hnena vote thlak tura zirtirna kalpui dan tur chi hrang hrang ngaihtuahin kalphung pangngai lo deuh, thil thar chhawpchuah chi hrang hrang an sawiho.

CEO hova Ningania mi pawimawh thukhawmte hian Lok Sabha MP thlan huna vote tla a that theih dan tur an ngaihtuah a. Pu Madhup Vyas-a chuan inthlanpui awm apiangin Assembly inthlan aiin Lok Sabha inthlanah vote tla a chhe ziah tih a sawi a. Mizoram chu Assembly inthlanpuiah ram pum huap pawha vote tlak thatna ber a nih thin laiin a hnu lawk thla 4 awrhah Lok Sabha MP thlan lehngal a ni thin a; MLA inthlanpuia vote tla a phak loh bakah Lok Sabha inthlan hnukung ber kum 2019-ah phei chuan ram pum vote tla chawhrual pawh a pha lo a, tan lak a tul hle a ni. a ti. Thutkhawmah hian a bik takin thalaite leh a vawikhatna atana vote thlak tur te hnena hmalak dan tur uluk taka sawiho a ni a. Micro-level-ah tan lak a ngai hle tih sawi niin, School Education department, Higher & Technical Education Department leh Sports & Youth Services Department kaltlanga hmalak dan tur chi hrang hrang duan a ni.

Thutkhawmah hian Addl. Chief Electoral Officer Dr. H. Lianzela, Joint Chief Electoral Officer Pu James Lalnunmawia, Sports & Youth Services Director Pu Lalnunhlua; Aizawl Bawrhsap Pi Nazuk Kumar, Joint Director, School Education Pi R. Lalnunthari, Jt. Director, Higher & Technical Education Dr. Lalthansangi Fanai, Deputy Chief Electoral Officer Pu Henry C. Lalrawnkima, Scientific Officer, MIRSAC Pu R. Lalfamkima leh Election Department official-te an tel a ni.

<><><>

HEROIN HAUL

Excise & Narcotics Department hnathawkte chuan Ningani chhun dar 11:50 khan Champhai leh Zokhawthar inkar kawngpui, Sapianmaksak hmunah Heroin Kg 2 leh gram 475 (Hawng 202) an man.

Excise and Narcotics department thupuangtu Pu Peter Zohmingthanga hnen atanga thudawn danin heroin an man rual hian a neitu nia puh, Lalruatmawi kum 29, Chekan, Myanmar-a khawsa nia inchhal an man bawk a. Heroin a phurhna leh a thuhrukna Hyundai Verna Car pawh hrensak nghal a ni. Heroin vanga man, Lalruatmawi hi The Narcotic Drugs & Psychotropic Substances Act, 1985 tlawhchhanin thubuai siamsak a ni a, thubuaiah hian thiam loh chantir a nih chuan kum 10 atanga kum 20 thleng Jail tan leh pawisa Cheng Nuai 1 atanga Cheng Nuai 2 thleng chawi bawk tura hrem theih a ni.

Dan kengkawhtute chuan kum 2021 February thla bula Myanmar sipaite'n mipui thlante kut atanga thuneihna an chhuh luh hnu khan sorkar inrelbawlna mumal a awm loh avangin Myanmar atanga Mizorama ruihhlo tawlh hi nasa taking a hluarin a pung chho a; nikum May thla bul atanga Manipur-a chi leh chi intihbuaina avang khan a rawn hluar leh zual ta bawk niin an sawi.

<><><>

LUNGLEI AIDS

Lunglei DC Conference Hall-ah District Health Committee Chairman, Bawrhsap Pi Ramdinliani hovin District AIDS Prevention and Control Committee (DAPCC) an thukhawm.

Thutkhawmnaah hian Adolescence Education Programme (AEP) Training kalpui mek leh kalpui zel dan tur te rel a ni a. Lunglei District chhunga Private School hrang hranga zirtirtu pahnih, mipa leh hmeichhia te chu tunkar Thawhlehi leh Nilaini khan ni 2 chhung AEP training an lo pe tawh a. Heng Training la chhim ve lo mimal enkawl sikulte tan training hi buatsaih leh a ni ang. State APCC-in District APCC member tura a lo ruat, mahse DAPCC member atana a ruat loh te chu DAPCC member atana ruat belh an ni bawk. Tangkai zawk leh phuisui zawka Mobile Integrated Counseling and Test Centre (MICTC) hman dan tur te rel a ni a. Lunglei khawpui chhunga hmeichhe inzuar an awm chuan zawnchhuaha chunghote chu AIDS laka an him theih na'na hmalak dan turte sawiho a ni bawk.

Thutkhawmah hian Secretary leh District AIDS Control Officer ni kawp Dr. K. Lalhmachhuana'n DISHA Lunglei Cluster chungchang report peiin, DISHA Lunglei Cluster hi District-ah MSACS hnuaia HIV/AIDS Program hrang hrang te Surveillance leh State AIDS Control Society Programme hrang hrang kalpui tur leh a tul anga DAPCC inkhawm kova District Level Monitoring lo ti tur a din a ni a. A hmain DAPCU (District AIDS Prevention and Control Unit) ni thin kha NACP kalpui tan atangin DISHA ti-a thlak a ni. HIV/AIDS hri darh zel tur chak leh zuala venna kawnga NACO (National AIDS Control Organisation)-in a duan thar a ni.

DISHA Lunglei Cluster hian Cluster a nihna angin Lunglei, Serchhip leh Hnahthial District te a bial a. 2018 atanga 2023, kum nga chung hian Lunglei District hnuaia mi 37,716 thisen endik atangin HIV hri kai mi 1,151 hmuchhuah an ni.

<><><>